

國朝耆獻類徵初編卷三百七十九目錄

孝友五

劉龍光

王掄春

吳贊

范鉉

房廷祥

鄧鍾雲

子梓佳
孫友仁

謝德健

從孫身耘

譚希遲

丁國望
葉啟六

金鼎保
溫世儒

何復漢

李中德

謝命爵

胡夢豸

黃明德

龔自成

王廣文

程含光

王攸甯

汪灝

弟晨
日昇

日昂

楊文蔚

吳瑞鵬

顏伯璟

國朝耆獻類徵初編卷三百七十九

通奉大夫前署江西巡撫江西布政使司布政使湘陰李桓輯

孝友五

劉龍光

君諱龍光字蓼蕭遠祖曰德基自汴從宋高宗南渡官黃州統領
居建康其後曰順之仕元爲平江路榷茶提舉遂家焉曰政中明
建文元年鄉試第一方公孝孺之所拔也金川門之變痛哭不食
死追諡靖節先生嗣子曰鉉歷官詹事府少詹事卒諡文恭其曰
礲者君之曾祖也祖曰衡父曰廷諤以宜黃縣丞遷益王府長史
遭亂挈家人避兵白石嶺下依其友姚肅甫以居尋卒君初以省

試還里兵後不知父母存歿日夕涕泣家故貧徒步至建昌訪益府故舊無存者禱於張令公祠夜宿廡下夢神告曰寄居石淙覺而詢之土人蔑有知其處者君持零丁帖彷徨道左有一尼謂曰是在閩粵之交官路方構兵道梗塞由僻徑以往七日可達君如其言越藤峽通仙嶺一綫天皆崇山邃谷潛狙虓虎所出入末度白石嶺路尤險惡嶺萬仞蟻旋而上下臨絕壑又萬仞得微徑棘荆蔽之血漬足踝力盡乃登俯視山下有村村中板屋三楹流泉泱泱鳴石上君心動以爲石淙也叩其戶則母管孺人出焉喜劇而哭問父所在則亡踰年矣又大哭問殯何地則在板屋中又哭村民聞哭皆來觀曰吾鄉宋時有孝子王龍山者於此見其母故

堡以見母名今子復見母此地是亦孝子矣於是君謀歸喪肅甫
首以白金爲助村毗咸樂用力藤束其棺以百夫舁之踰嶺而下
浮江以達於里監察御史李森先巡按江南欲聞之於朝君曰
常事耳不可乃止君歸十年母卒哭葬盡禮平居好讀書研精小
學旁通醫術以及風角地辰截壬遁甲之說靡不考索康熙十一
年元日筮得大過之蹇歎曰過涉滅頂吾其不免乎是年十一月
果卒年六十有四娶沈氏繼娶吳氏子男二人椿齡石齡女一人
壻俞同珩孫男女各一人石齡與子善君之葬也來請銘銘曰
孝之至通神明身雖隱名則光吾友其子銘其藏卜茲幽宅斯永
臧

右墓誌銘朱彝尊撰

始余讀柳先生襄陽丞趙君墓誌其孤來章求其親之喪柳州曰
哭於野兆於卜筮果得老叟告以所嘗絕處能完其喪以歸後見
錢受之所記丁高士鶴年明初兵亂生母馮阻絕武昌病死瘞廢
宅中鶴年痛哭行求夢其母以告齧血沁骨返葬於時烏斯道作
丁孝子傳而我吳明季時亦有黃孝子向堅者萬里勞苦迎其親
雲南尙無恙里人豔稱之演爲傳奇每廣場奏曲兒童婦女皆出
涕也嗚呼維我亡友蓼蕭劉先生之孝行實與三君子相類顧事
不大顯則以先生自謂人子之不幸雅不欲自暴則其情尤可痛
也於其歿也不可以不書先生父無懷公丞宜黃後爲益王長史

先生皆從以就試歸會順治乙酉亂作道梗塞不得兩大人問則
日夜泣旣疾甚而中弟又歿家故貧經紀其喪畢益自號曰吾魂
魄當依吾二人也戊子病少間卽徒行至於盱江故益王分封處
時被兵燹故人無在者禱於神張令公祠宿廡下夢中聞神有寄
居石澌之語驚而寤不知石澌何所也問其土人亦無知者旁皇
路隅忽遇一尼謂曰石澌在閩廣之交今方阻兵由徑路往七日
可達也亟如其言取間道凌絕險所過藤峽通仙一線天皆高山
窮谷灌木蔽翳鳥獸咆哮少人行處所顛頓迷失萬狀最後至白
石嶺嶺斗絕下臨溪萬仞壯夫股慄前卻獨奮不顧足踳踳彊行
踝血殷流卒捫其嶺而下果得母管夫人於其地名石澌之空村

中母子相持大慟亟問父所在管恐驚兒也謾應之固問乃更悲
咽言而父於去年丁亥八月中歿距汝今到將一年所矣則仆絕
於地久乃甦先是無懷公避亂倉卒僅藏其先世系圖篋中自隨
先生將到篋颯颯有聲啟視無有閉則復然一日其母夫人見緋
衣神一一從篋中出而先生至矣鬼神之事非余所能知然以祖
考一氣之理推之當信其村又一名見娘堡嗚呼豈偶然哉無懷
公旣歸葬管夫人每爲人言吾兒往來道里險惡扶持辛苦淚汎
瀾不止又十年而管卒先生益自痛已矣無可以逮吾二人者自
是益泊然無意於人世矣先生之歸也有爲石澌瞻雲圖歌者和
者頗眾而李御史森先按吳欲以其事聞於朝先生謝曰此恆

事耳何足言御史以此益多之先生自少攻舉子業受知太守史公時吳祭酒梅邨亦史所拔士史嘗語人劉子之才當大於吳而先生顧不肯俛仰隨時俗進取自屏爲古學尤精於爾雅蟲魚之義音切箋釋皆極其旨然亦不以自名閒以其意學醫又不拘故方揣色審意輒中以此少能具伏臘資諸公貴人邀請多弗往於窮交輒樂爲之盡其術性寡諧不爲翕翕熱遇有不可必達其意然坦中無他腸人咸安而親之以爲長者也先生諱龍光蓼蕭其字先世故河南人自黃州統領公諱德基扈從南渡居江甯再傳而遷長洲者爲平江路權茶提舉諱順之提舉三傳而生靖節先生諱政靖節無子嗣子爲少詹事諡文恭諱鉉文恭生副使諱瀚

副使生承德郎諱霖承德生文學諱兼先生之高祖也諱璣曾祖也自曾祖以上至統領公皆有像所謂世系圖者也祖諱衡無懷公諱廷諤皆有名諸生閒無懷佐藩朝未竟其用至先生益載其德隱而弗耀人咸謂劉氏能業其家云王子春先生自筮得大過之上六歎曰過涉滅頂吾其殆矣果以其年十一月卒年六十有四娶沈氏繼吳氏皆名族有婦德子二長椿齡慧而天次石齡女一適俞同珩皆吳出石齡好學能文持身有法度以庚申十一月葬先生祖塋之次而來乞余墓上之辭初先生所與最故者爲余外舅西淵李先生與金子穀似卽壻石齡者也最後乃忘年於余三人者時過從先生談說義理以學問行誼相規切同急難其有

無有古良友之風義先生年六十余外舅爲文以壽敘致委曲而
其歿也穀似爲詩哭之過時而悲余旣弗及臨先生之喪以爲大
感敢以不文違厥子請因舉先生立身之大節足風世之爲人子
者而略及其餘以識其梗槩俾書之石永有視於後人

右墓表韓莢撰

劉龍光字蓼蕭長洲生父廷諤官益王長史 國初道梗不通龍
光始以省試歸至是扶病往達建昌益府故人無在者禱於張令
公之神夢中若告以石漈語然不知所謂久之遇一女僧云石漈
在閩粵之交方今官道阻兵須開道可達龍光冒死穿藤峽一綫
天踰白石嶺萬仞蟻旋而下血漬雙足過山麓果遇母於石漈空

邨中名見娘村宋孝子王龍山見母處也父先一年死矣奉母扶
櫬歸孝養十餘年母歿以哭母得心疾終其身

右傳沈德潛撰

初順治乙酉五月 王師破建昌城明益王遁去長史劉君某挈
其家亡匿山中卒其伯子龍光卽孝子也爲諸生先赴試歸吳未
得父耗憂泣成疾戊子歲始決策至盱江時亂後藩府毀廢舊人
無在者邑有張令公祠宿禱焉夢中恍惚如聞神語云寄居石淙
者醒求其地不得徬徨道左遇一尼謂曰石淙在閩廣交今方阻
兵道塞有徑潛行七日可達也遂如其言取道往所過藤峽通仙
一線天皆山谷窮絕處蒲伏晝夜行數百里不見人煙最後至白

石嶺嶺陡接霄漢阪道陜者纔六七寸俯臨不測之谿捫壁絕險
旣上復下履巉巖衝虎豹攢棘被膚血流殷足每仰天一號則陰
風颯然山木悲嘯瀕於阨危者數矣嶺盡得村尋得父所依姚氏
居母管孺人在焉旣入門母子相持而泣已問知父喪行一年所
則號絕仆地久之始甦居數月閒關與櫬復踰嶺侍母而歸歸十
年母卒當母寢疾孝子侍湯液不解衣帶者四閱月也初長史避
難數遷獨攜先世世系圖冊一篋自隨至歲戊子母時聞有聲窸
窣出篋中啟鐫無有閉則復聞一日母見緋衣人數輩冉冉從篋
中出益大驚逾宿而孝子至矣其所居村見娘堡舊傳宋王龍山
者於此見母得名異矣哉鬼神幽明之故君子之所慎言也而父

子骨肉之間顛沛流離之際微應巧合又往往若有陰相之者非
苟然而已也其子某因婦翁金進士穀似屬余傳之余嘗慨自明
季中原兵起延蔓四五十年其間父子分散各所夫妻生死異路
抱忠孝節烈名填溝壑者何限其幸不相隨以沒而閒著於逋臣
逸士之手者又多避忌諱不出或文辭蕪漫不足以傳而表孝子
之墓者有韓閣學之辭在特工又綴以余之文則所以不泯君於
後世者庶在乎此也孝子字蓼蕭蘇之長洲人

右記姜宸英撰

王掄春

吾邑有高才生王之垣以文藝有聲庠序閒數年前葬其本生父文學元遴來乞余銘余未有以應也今年冬王君之壻顧雲如走數千里來京師爲之垣申前請願與余中表戚之垣又素遊吾門王君行又應銘也其何辭君諱掄春字元之改字元遴曾祖瀛洲君一恭自太倉州徙崑山爲縣人祖集虛名周緒考仲翔名雲鸞王氏故有東王西王君曾祖以上居太倉累世貴顯蓋東王也縣中之王從太倉分支爲西王科第舄繹與太倉埒惟君一支三世爲諸生未有仕者及君爲諸生當有明末造未久棄去人訝之君笑曰非公等所知也君母弟二人季弟振春早卒仲弟捷春出後

叔父霖環考仲翔君歿君悉推產與弟弟善病罄其產又以所居宅讓與之及弟卒人莫肯爲之後者君歎曰家貧眾所棄吾弟其爲若敖氏鬼乎令仲子之垣嗣之爲之經紀其喪作嗣議一篇以明重宗祀不計實而有名之意比君卒其宗老增城君誄之曰迄於仲氏讓生之死方讓以產又讓以子嗚呼古者立後之法惟重爲大宗蓋以奉宗廟之祭也其他旁支庶姓絕續無所繫死則祔祭於昭穆亦未嘗乏祀自世以遺產爲意幾於人人有後至有爭立並建者是則貧而莫肯爲後亦君子之所憮然心傷矣君讓產於出後之弟又推其子以後之敦本厚施是不足以風世砥俗乎增城君名瑞國奉常麟洲之孫仕增城令於君爲近屬亦所稱東

王者也配沈氏有賢德君生於明萬厯辛丑歿於
年七十有二舉鄉飲大賓沈生於萬厯戊申歿於康熙庚戌享年
六十有三子二曰堃曰之垣廩膳生卽後捷春者也女六俱適士
族雲如其一也孫男女十二人長孫鉉學生蓋自君高祖副使公
而後六世爲諸生矣康熙庚申年十月其子奉君夫婦之柩合葬
於露區沈親好之新阡後七年邑人徐乾學始爲之誌且銘銘曰
鐘鼓樂鸚車馬載馳不如深林以趨以棲獨行耶隱逸耶百世之
後於吾文乎是稽

右墓誌銘徐乾學撰